

潛心堂集

潛

中

草

藥

潛心堂集卷

南海 桂文燦 子白

蒹葭篠雅集圖記

同治十年辛未夏五之朔潘伯寅侍郎張孝達太史  
集同人於都門西南之龍樹寺意欲振絕學起廢滯  
而四方文學之士願見而無由達者共得聚首一堂  
或相見恨晚或班荆道故酒酣耳熱各出其故聞新  
知以上下其議論侍郎豫具楮墨囑記其事維時霖  
雨初晴新綠如滴薰風時至夕陽在山文燦不獲以  
不文辭迺遂言曰昔人之美皇華使者曰周爰咨諏

其次章曰周爰咨謀其三章曰周爰咨詢其卒章曰周爰咨度孔子之美孔文子也曰敏而好學不恥下問子貢問爲仁孔子曰事其大夫之賢者友其事之仁者孟子又云一鄉之善士斯友一鄉之善士一國之善士斯友一國之善士天下之善士斯友天下之善士士大夫同朝共事豈盡能杜門卻掃而在上者多不喜譏謀詢度而在下者又無由交其賢豪長者似於孔孟之學背道而馳恐有不學將落之歎侍郎太史其有所感於此乎我

皇上冲齡踐阼聖學日富天下之士莫不翹首企足

冀親政以致太平豪傑之士果能羣策羣力共圖國  
事安見

中興盛業不於吾身親見之哉咸豐二年壬子夏五  
既望同人公祀顧亭林先生於城西之報國寺一時  
文學之士咸在如方子佩給諫陳頌南王子槐兩侍  
御徐彝舟何地山兩太史楊湘雲丁頤伯兩戶部陳  
卓人馮魯川何願船三刑部葉潤臣孔繡山兩侍讀  
邵蕙西徐孟卿兩舍人洪子齡江龍門兩大令包孟  
開林薌谿王芝原孔玉雙孔鼎甫五孝廉苗先路張  
識白兩明經非耆年碩學卽傀異奇才文燦以譎陋

末學酬酢其間獲聞緒論與茲游恍然如昨維時年  
少氣盛自謂不朽之業十年可成詎意倏忽已二十  
年賢豪多化異物惟地山薌谿玉雙數子獲存文燦  
則齒增學廢撫今追昔尤不勝感慨繫之也是日集  
龍樹寺蒹葭篠者閭進甫太史秦誼亭陳培之胡荻  
甫李蕤客四戶部董研樵觀察趙撫叔王壬秋許鶴  
樵袁鶴舟陳逸山王蓮生王子常張子餘譚叔裕孫  
仲容十孝廉及文燦凡十九人未至者黃元同趙桐  
孫許海樓吳仲飴王子莊楊惺吾六孝廉謹具書之

莫愁湖雅集圖記

自古豪傑之士當天下大任莫不有三握三吐之風  
以羅俊乂故能集思廣益郅治太平降及後世士大  
夫每具兒女之態不欲見人官尊者恥於下問其失  
也傲學淺者不求上達其失也愚晦盲否塞於茲爲  
極惟今

宮保節相元侯曾公謙遜持躬而虛懷待士愛才若  
渴而從善如流道光中官京師閑邪陳善周諮博訪  
延攬英才講求古今利病四方之士咸歸之迄咸豐  
初天下多故奉

命督師拔識賢豪東南保障及同治改元蕩平粵寇  
底定江南功冠一時名垂後世虛衷益篤而謙尊彌  
光夫而後知

公秉性之良而所學者大也夫而後知

公好善之誠而所蘊者深也江甯城西有湖曰莫愁  
湖上有樓曰勝棋明太祖削平羣寇定鼎金陵嘗與  
中山王奕王勝太祖賜王以樓故名樓燬於兵燹同  
治十年辛未八月八日重修落成維時金風爽颯秋  
水溯洄荷芰著花互相輝映

公集同人讌於此一時文學之士咸在以觴以詠以

上下其議論於以拓心胸陶性情增學識化氣質極  
朋友之樂視太祖與王奕勝而賜樓極君臣之樂將  
毋同世之官尊而傲學淺而愚者可不知所則效乎  
是日同集者凡十有八人李小湖大理莫子偲舍人  
范崔生曹鏡初兩部郎吳桐雲陳六笙薛慰農三觀  
簪何蓮舫太守馬鍾山劉恭甫兩大令汪梅邨張廉  
卿兩孝廉張嘯山戴子高兩學博唐端甫劉叔俛兩  
茂才及文燦也未至者一人曰成芙卿茂才謹具書  
之



送郭筠仙中丞內召序

詩皇華篇美使臣之辭曰每懷靡及其次章曰周爰咨諏其三章曰周爰咨謀其四章曰周爰咨詢其卒章曰周爰咨度毛傳以每懷爲懷和以周爲忠信義本魯語毛傳言訪問于善爲咨咨事爲諏義本左傳毛傳言咨事之難易爲謀咨禮義之所宜爲度親戚之謀爲詢義本左傳及魯語此皆古義而毛公述之粵東之大患有二一則士林止攻舉業甚或以勦說爲能而讀書植品者不多觀也仕宦止圖好官皆恃其曹掾相助而修己治人者不多觀也晦盲否塞泯

泯焚焚蓋數十年于茲矣今

上登極

勤求治安

特命楚南郭公以鎮撫之

公下車伊始周咨博訪求通民隱舉衆人所不知者而

公無不知之誠深於皇華之義故三年以來尊經重  
士去蠹鋤奸吏化其廉民懷其德咸思久於其任里  
巷且聞誰嗣之歌矣乃奉有內召之

命夫巡撫爲旬宣之職省方觀民則當入告我

君以設教況我

皇上冲齡踐阼

皇太后垂簾聽政海陬民隱容有未能上達

九重者

公本

先朝舊臣而又天下才也洞悉古今治亂之源周知天下疾苦之故入覲于

朝幸從容告我

君以舉措之則四海共享昇平之福而

中興之業益盛倘或不出而圖吾

君則非蠢愚之所敢知矣是爲序

送郭筠仙侍郎出使英國序

昔子貢問孔子何如可謂之士孔子曰使於四方不辱君命可謂之士又曰誦詩三百授之以政不達使於四方不能專對雖多亦奚以爲是古之出使者必有恥之士經學之儒也泰西各國使臣入駐燕京者已十餘年矣

朝廷未嘗遣使報之

今上

御極之二年丙子秋九月

特命禮部侍郎楚南郭公出使英國又

特進刑部員外郎番禺劉君爲五品京卿副之瀕行  
之際屢次

召見慰勞備至仍恐其辱君命也英國在西洲西北  
去中國數萬餘里自古不通中國明末始來互市嘉  
慶中葉嘗貢於

朝士大夫之出使於此者自此始吾因茲重有感焉  
夫聖人之道猶天也圓頂方趾之儔有君臣上下父  
子夫婦之倫則當有忠孝禮義之則有飲食衣服男  
女耳目之欲則當有仁恕愛敬之心無論大小强弱  
無論遐邇中外皆天之所生也天旣生之天旣養之

而不教之此非天心也中國故事古聖羣經不傳海外此非天意也道光中藉小釁以起兵戎二十年來凡三犯邊而外國無不得逞者天將使聖人之道西行也楚南郭公廉隅自勵經學湛深天使之西行蓋堯舜協和萬邦之治復見於今日也蓋中庸懷柔遠人之道復著於今日也昔者英國聰穎之士嘗譯羣經以西文而教授其國人矣而經義精微非得海內儒宗以啟迪之聖人之道終未能顯著於萬國而今而後英國聰明特達之士必羣奉

公爲師表如楚產之陳良者蓋不乏人萬國羣起而